

程
侍
郎
遺
集

程侍郎遺集初編序

先大父宰歙徧交其邑之名儒而戶部侍郎春海程公之考蘭翹學士以僮子從父後肄業斗山亭特爲大父賞拔學士家極寒大父召入署躬督教之衣食視諸子不數年諸經注疏皆精熟爲文濯辟精粹試必冠曹舉乾隆丁酉拔貢入成均連掇巍科儼直

內廷聲望斐然顧艱於嗣晚乃誕公公丰儀玉映父母珍若連城七歲就傅每日讀書不過二時而寒燠晦霾氣候失和皆輟課曹顧厓少宰大父庚寅分校南闈所

得士也時官侍講先君子從之遊與學士同邸每抱持
公問以書不能荅則徧檢輿僻不經之字相詰難蓋好
奇不羣幼性爾也比學士卒於山東學政任所

高宗純皇帝特簡歙人之官清要者俾往經紀其喪因
以少宰嗣司校事少宰延先君子同往至則爲庀其行
篋握公手送之登車年十有一矣已而先君子會試入
都見學士舊僕訊以門戶近況則言公子發憤力學入
邑庠大被宗師賞異出應試小賦名雋綺麗歎爲絕倫
逮乙丑再赴禮部試公亦偕計吏來京師風雅淹博輦

下共推爲才子又越七年遂與先君子同舉進士入翰林公嘗贈穆詩曰君祖授我嚴獎誨若子姓君嚴我同譜欣契挫其敬蓋實錄云公負奇氣博觀強誦於經訓史策天象地輿金石書畫至遁太乙脈經格學莫不窮極要眇究析發皇之而精神所到卓絕岸異必然可傳於後者則其有韻詩文也詩初好溫李年長學厚則昌黎山谷兼有其勝又際會清宴無金革流離之事傷其耳目故形之篇詠者率排翫安帖力健聲宏琅琅乎若鸞鳳之嘯於穹霄也穆於癸巳之春初侍公直園情好

之治久愈摯不三五日必召過飲投巾振袂談議交錯
寒士之被禮者殆無與比嘗請公自訂其詩公曰吾詩
險而未夷能飛揚而不能黯淡思力所及者腕每苦其
不隨更讀書十年殆可相質邪嗚呼孰意所業之遂止
於斯歟丁酉夏穆將歸應鄉試行有日矣公置酒相餞
漏過午拳拳不放別乃穆甫出都門公遽感暑疾久不
瘳祁淳父尙書日往省之沈頓之頃尙以穆試事爲念
遺言乞儀徵相國銘其墓而尙書書之次年穆將南游
迂道入京師哭公公子德威以遺稿相授塗乙潯州首

尾多不完或篇題殘挽乙酉以前之作竟無一字存疑
公尙有清本藏之別笥德威未檢獲也謀更事搜采成
完秩荏苒未遑而德威又以措交庫款赴粵東卒於劉
仲寅觀察署中觀察名景昌公視學貴州所拔貢生公
歿後所以賙恤其家者有加德威卒命其弟送柩返歙
買山營壙并葬公及金夫人兩世三棺其孤孫嫠婦之
寄寓京師者則祁尙書爲經營擁樹之觀察又議以幼
女妻德威之子而娶其女爲己子婦迎公全家入黔相
依以久嗚呼師恩友誼人有同情當公賓客填咽之時

詎知身後巨卿乃此兩人哉穆幼聞先君子之所以稱公者長而公之相待略如大父之待其先德知己之感永永弗諼也今年春尙書謀刻其遺集曰以此爲初編續有哀錄補梓易耳穆旣恐殘斷之稿并歸蕭落又懲夫嫁名僞撰者之厚誣公也乃偕公門人何編修紹基排比爲賦一卷詩四卷又凡稿艸之失題者及詩餘試帖共爲一卷碑志哀誄駢儷雜著之文五卷總題曰程侍郎遺集而敘其緣起如此以酬公知兼志余痛云道光二十有五年端蒙大荒落三月旣望平定張穆序

程春海先生集序

嘉慶九年先生年二十來鄉試江寧始相見讀其詠史詩若干首先君子呼曾亮曰汝見程公子詩乎渠長汝者一歲耳及道光十一年先生來主講鍾山書院相見益親夜過其邢氏寓園月出園中竹石如沐池光盪人面坐水檻中盡讀其所作於別後者而幼聞得名以黃蝶詩及前見者俱不復存矣是時總督陶文毅公政寬簡民吏樂逸多興復湖山寺觀而葆益舟觀察尤好爲主人泛酒船至燕子磯飲絕壁下還過嘉善石壁訪梅

花水夾蘿峯飯半山亭聽銅溝水聲循定林寺古道歸
以爲常先生及曾亮數人皆其座中客也復至京師爲
先生戶部屬官遇我一如其舊山館野寺未嘗不偕偶
召賓未嘗不與也有所作必見示時命同作然常十不
副一而先生則於詞無所窮其稱情輔意足以射聲叩
景如高貴者無所志而不就也丁酉夏忽見語曰吾庭
中樹鴉數百夜噪而飛拔巢去此何祥也未幾而病呼
余與訣余雖悲猶以爲倘不至若是後十餘日竟卒自
先生去江寧其同游者任階平王竹嶼汪均之皆已死

而觀察亦歸殯京師輦駟馬之墓側先生往哭甚哀及
余與徐蓮峯哭先生去哭觀察時未三四年今蓮峯又
亦久死先生之卒已十年矣悲夫戶部尙書祁公以其
孫幼孤遺集或散佚屬張石州大令編而校之曾亮不
可無一言綴於末也先生平居無時去書其學實事求
是而能創獲新義阮相國何子貞編修及石州已詳言
之故惟述少長離合南北游處之歡以見略勢分而篤
古誼如先生者殆不可多見以誌吾哀至所作深博雄
偉讀者當自得之非言詞所能贊也雖然先生之異乎

流俗者豈獨其詩文哉人嘗屬曾亮以事而匿其情漫爲請於先生覆書曰吾子而有是言豈某生平有不見信於深友者乎不然則子受紿也其行已情深而義方雖他事類如此傳曰直諒多聞古之益友又曰夫惟大雅卓爾不羣先生殆無愧斯言夫殆無愧斯言夫道光二十六年六月上元梅曾亮撰

誥授榮祿大夫戶部右侍郎兼管錢法堂事務春海程公墓志銘

儀徵阮元撰

壽陽祁寯藻書

公諱恩澤字雲芬號春海程氏東晉時有爲新安太守者居篁墩又遷歙南代有隱德曾祖筠祖步矩郡生員父昌期乾隆庚子進士第三人及第上書房行走翰林院侍講學士母項氏總兵樛木女公幼穎異毀齒經傳皆成誦尤好讀古書遇疑意必考問釋然而後快鄉

先達曹文敏公金輔之先生皆語學士曰此子逾冠所學不可量矣乾隆六十年學士卒於山東學政任公甫十一歲哀毀力學及長補學生員益博綜經史從外祖學騎射能挽強弓最後乃從凌仲子先生遊及其間奧先生曰天人並至博而能精將來所成者大也嘉慶甲子鄉試中式舉人居京師益勤於學天算地志六書訓詁金石皆精究之辛未會試中式 殿試二甲改翰林院庶吉士散館授編修道光元年

命在南書房行走

召諭曰汝父蘭翹先生品學朕昔年最敬汝之聲名朕亦皆知宜更守素行今戶部侍郎祁公嵩藻同召見親聆

聖訓出語同朝皆榮之旋奉

敕校刻 養正書屋集是年充四川正主考二年補春坊中允校刻

御製詩文初集三年放貴州學政補翰林院侍講轉侍讀五年補春坊右庶子冬補侍講學士次年調湖南學政回京

詔充春秋左傳纂修官補國子監祭酒九年項太夫人卒丁憂歸歟十一年起服入京仍在南書房行走十二年以候補祭酒未與考差

特放廣東正主考十二月

命在上書房行走課惠親王學主敬禮師傅出于至誠講學爲詩古文書法皆日有進甚相益

上與王論公爲人有和而不同之目十三年

超擢內閣學士兼禮部侍郎冬充文淵閣直閣事十四年

授工部右侍郎兼管錢法堂十五年會試知貢舉開戶
部右侍郎管錢法堂充 殿試讀卷官閏六月

諭程恩澤部務較繁著無庸在上書房行走十六年復
充 殿試讀卷官十七年充

經筵講官夏受暑醫逾月病愈深遽以七月二十九日
卒明日遺疏入

上嗟嘆悼惜久之

諭曰程恩澤由翰林洊升卿貳前在南書房上書房行
走有年人甚謹飭辦理部務克盡厥職近因感受暑溼

賞假調理方冀速就痊愈益資委任茲聞溘逝殊堪軫
惜伊子程德威著加恩賞給舉人服闋後准其一體會
試公學識超於時俗六藝九流皆好學深思心知其意
本工篆法益熟精漢許氏文字之學官貴州學政時與
布政司吳榮光勸士民育栗蠶其利大行於民又重刻
岳珂五經以訓士及奉

詔刻春秋左氏傳與祁公共議推本賈服不專守杜氏
一家之學平日好士說士技若已有典試廣東期取實
學之士知會劍之名必欲得之劍久丁憂公不知也書

榜大失望然所得佳士亦甚多出闈後與學海堂學長
吳蘭修等遊白雲山名士會者數十人有蒲澗賞秋之
圖所著述惟國策地名考二十卷已寫定本其餘多未
成書實不自料其遽折詩文雄深博雅稿亦盈篋其孤
方治喪待錄成卷帙就有學者擇之當成佳集公又多
藏書宋元以來子史雜錄博覽強記金石書畫亦多考
訂苟有叩者必舉以應元入京與公居相近尙以暇相
講習元偶校毛詩有椒其馨椒字訛本是馥字其訛久
在六朝罕可相語者持以示公公獨深會其意謂詩苾

芬孝祀韓詩作馥芬孝祀馥字毛韓兩見形聲不謬於
六書爲加一證公又謂近人治算由九章以通四元可
謂發明絕學而儀器則罕有傳者乃與鄭君復光有修
復古儀器之約又嘗深究開元占經謂道光十五年木
火同度當有火災人驗其言而躔之吉地案發因水之
故曹文正問公古有之乎公曰水齧王季墓見棺之前
和呂覽載其事所撰國策地名考如謂孟津在河北非
今孟津縣亦非古河陽縣蒲反非舜都乃衛蒲邑以嘗
入秦仍歸故謂之蒲反諸條皆確不可易公之歿也年

僅五十有三朝野皆悼惜之金夫人以道光元年卒二年繼娶劉夫人孫一名新寵公於元例稱門人且仲子先生爲吾友學術相契因爲之志銘曰公之爲人和而不同厓岸內峻德氣外冲兩世內廷在位靖其聲名品學守之惟公公學之大啟於凌氏約禮博文實事求是研究經義及於子史卽以其學望之於士嗚呼天命限公不祿

帝諭飾終

賞延世篤遺書未定集之可讀我鐫此銘永貞宰木

程侍郎遺集初編卷一

歙 程恩澤 春海著

杻賦 并序

澂懷園食筍齋後土阜有嘉樹三居者過者皆罔識其
名予初亦嘗焉繼綜其華實枝葉審諦之定爲北山之
杻按杻兩見詩一見周禮一見爾雅屢見山海經詩毛
傳云杻櫪也卽用爾雅文疏云葉侶杏而尖白色皮正
赤按木皮少正赤者爲木多曲少直枝葉茂好二月中
葉疏華如棟而細蕊正白正名曰萬歲或謂之牛筋或

謂之櫪材可爲弓弩幹也郭注雅云侶棣細葉材中車輻關西呼杻子一名土樞其注山海經從同同說文作

櫪

別有櫪乃杻也

三輔黃圖曰枌詣晉宮闕名曰萬年樹

太平御覽

同皆杻也而本草經及李氏綱目不載豈以其非藥味

歟廣雅埤雅爾雅翼亦不載審此杻非難識之物自三代以來書屢見則無古今之異西都南都皆賦之則無南北之殊然自宋以後著錄漸少豈非顯隱有時人與物忽不相值耶遂作賦曰

有物於此蔭於堂背其枝羽喬而句其榮鈇析以碎曼

理文身若錯繒綺而被繪畫也予有稜而方一裹一縣
四核一房生青纍纍孰赤煌煌將零圻苞若蓋重囊臣
愚不識敢詢圃場或僂言於側曰此夫藹侶棟而素纖
者歟葉侶杏而益鐵者歟萬歲之名聞者頌者所意欣
者歟共汲之山華林之園杕詣之宮周秦漢以來所具
瞻者歟或揉車輞致遠而利往或奠弓幹揚武而捍患
有虬其條琅然振風有倩其景月宵瓏瓏曹一世而眇
知則不相尋於斧鋌外多曲而委蛇棍剛柔而積中願
託根於魁父之邱悲指名之洵洵故夫梓以爲羣棗以

爲爻樞以爲偶聞諸北山樵者之口夫是之謂柎也

南邨耦耕圖賦

并序

鄧子湘皋與其兄子振顯鵠齊名友愛至篤子振不欲其弟爲知縣畫聽雨圖以寄蓋取坡公慎勿苦戀高官職詩意湘皋亦作耦耕圖以見志乃爲賦之其詞曰

客飢阻以旅餐兮干通侯而東南睠沍萊而不歸兮又較道乎長安資姬髫而索納兮還髡徒而阻之思孟晉以迨羣兮或差誰而取之出卽脫乎簿尉兮又奚棄乎令長視已事以志墨兮定物遂而民向文豹欲潔其羽

毛兮宣鵠亦厲其高響安能以身之察察兮試紫水之
滃泱惆悵而私自憐兮委銀艾若泥塗吾將老於耕墜
兮吾將息乎詩書矧吾仲之清羸兮託長鑱以爲命考
豐年之瓦盆兮有倡于而無和聽天屬旣昇予有兄兮
獨奈何其舍旃前曜靈已虛擲兮後俄景其益遒累別
緒而成疾兮況家紛之此離予不從仲以歌舞兮仲曰
邁其難支朝三圭而夕萬鍾兮予不以易此耽樂也丹
吾轂而覆公餗兮予又安知其以市惡也莽無垠兮天
宇倏鴛鴦兮來下仲有書兮促歸感淮雨兮資之澍圖

蒼茫兮雨浪浪書不盡兮圖之詳季發緘以嗚嗟兮
探予心而鑄辭緬舊盟於合勦兮夢已接乎東菑乞丹
靑以抒懷兮聚伯亞於冷風之圻仲發緘亦當嗚嗟兮
胡與予心若相期系曰季才俊兮迺慎進兮仲知命兮
季益信兮返井通兮耦兩翁兮在南邨之宮兮

應

制元夕觀鐙賦

皇上御寓之三年乘震執規以順陽和大舉禮樂之盛
儀凡所以聯上下之意協臣民之慶莫不賅備而元夕

設鐙樹陳百戲焜耀於

禁禦得與觀者尤所榮幸

小臣

橐筆侍從銜

恩飲膏日浹月深茲復趨陪於圭組金紫之采延頸跂踵快心眙目沃穆歡咳不知所云承

命授簡用賦斯事小文末學無以闡述惟就賓主問答之辭以張中外同樂隆平郅治之景象云爾謹拜手稽首賦曰

擊壤老人曝榮而嬰撫塵而遊方春令節上元將娛乎駢坐之肆與冠蓋之州觀金支之華秀覽百戲之夥够

迺敏於青藜丈人曰恭聞

聖天子牟盧六合徵召五臚

新政新命照灼丹旻兵銷穀殖海鏡河軌民氣衍衍萬
方送喜於時青陽告辰鶴雲東行萃九寓之樂思以諧
平陽伯大謠之樂聲東市有銀花之樹西市有金羊之
鐙南市有攢星之樓北市有結綺之棚火戲電礮飛爆
雷鷹拖鈎拔河尋橦走繩魚龍曼延雲霞蔚蒸爾乃明
月照夜助以白雪士女炫服錦車鑒輿嫋嫋琳圃出入
金穴鬣鬚黃髮踏歌弭節跡才踵乎閭卷心又馳乎觀

闕聞竹肉而竟逐選燭龍而中輟鼎爇木其遞耀鑒秋
毫而未徹故夫周處風土之記宗懷歲時之書綵山珠
幕之麗芳苾蒲桃之殊莫不窮瑰璋之極形通敷宵而
畢臚子大夫照書之暇盍往觀乎青藜丈人乃盱衡而
荅曰上元然鐙權輿於太乙神祠僕相羊於叶蟄倉果
掩層霄而上之嘗以上元之夕獨涉乎石渠天祿見長
樂之繁富殊人世之軌躅子徒眴轉於銅駝金市而未
攀躋夫馭娑宣曲也方今

聖天子坐乎璇題玉英之宮召翼宿使舉樂驅鶉囁而

命黎融盛羽衛之上儀聚五色而宣八風陽景西匿光
在鐙樹彩游表道繡闕雲布擎場空寬橫以桂栢於是
三河健兒脈勇氣怡嗔拳卞戲觥頂交頤乳贅門酣威
讐老羆秋千高踞竝歌齊俯人方角技彼且笑語樂聲
唼囉來自朱波倂童冶謠作態嬋嬰印度二八繡襦持
斧同工異曲俱解羽舞劉吃施努俛翻反據兩兩拍張
連臂若狙立駿馬於明駝效解數而跳跟走巨纒而燕
輕試木熙而上翔紛字舞之陸離排絳紗而耀光班文
鴛以相顧列翡翠而重行爰乃暮靄彌望圓蟾欲湧列

炬娛夕枿櫨峻聳棍匱匝以方圓藏頃刻之奇花昂龍
首以頷珠散雉尾而成霞神絲千純芝蓋九葩粹芙蓉
於掌中倒珊瑚而槎枒或粲粲若飛星或熠熠若金蛇
或纍纍若編珠或零零若翦紗或穆襪若落英或佻儻
若繫瓜或闔戶而下虹或貫月而成槎絲管并舉細音
穆羽聞以鹽散節以鍾呂火鳳來下頰蚪對處旣薈萃
而成劇倏驚人以風雨列缺迅走如矢脫絃萬雷動地
萬鏡飛天萬燧繞林萬燭照田赤埃之氣蒸於赤泉黝
黝沉沉鬱爲祥烟乃復珍臺別館華炬載更

法駕移蹕丹天炳明虹膏瀾翻蜃液激清惟上穹之需
雲隨所遇而象呈若僕所言十分而未得其一端目可
治而口不能名也且夫有淳耀惇大之德以出納夫火
政而節宣其赫曦於是乎無灾輝之虞得改燧之宜陳
火戲之義蓋在斯也我

國家亶宇開拓伊古無偶於是乎具羌歌與蠻舞提鶚
婁而曳鳳首示甌脫之雁臣俾奔走而恐後我

國家大武三會人習擊刺於是乎寓兵機於蹙鞠程勇
力而相試嘆千城之足用美綺帛而寵賜又況豐年穰

穰紅粟盈倉

天子儉德素風捐珠犀而抵琳琅惟欲洽

文母之歡心乃怡豫而愷康澤四海以蓼蕭錫臣鄰以
篚筐於是乎值傳柑之嘉時進靈朴於臨光也青藜丈
人陳說未畢擊壤老人乃翹首而頌曰侯其禕哉當堯
舜之時日月光華星辰爛陳紉縵卿雲或或闕闕持以
喻

禁苑之景光與不夜之良辰洵異代而同春也夸於市
人異見異聞相與婆娑乎九衢不知東方之旣昕

山梔花圖賦

恩福堂師園中梔子花夏嘆未放經秋涉冬花
盛繁師有句命澤同作因賦

雪嫋嫋兮六出蘆薈支掩其嬌兮於山之隅其心孔齡
兮其房則松苑兮斂兮夏冉冉兮兩渠歉兮長顙頷兮
皦兮皦兮蕊穠穠兮秋增枚兮冬茂蓂兮唯有美之當
階與眾卉而異芬塊獨得其清逸兮通疏伽之遠聞犯
嚴威而弗瘥傷兮豈恃幕帟之輪囷樹本旣其厚兮雖
猷僚而彌新諒不棄遺於君子兮惜堂堂之芳晨際搖

落而采擇兮懼醯醢之就湮亂曰心同而面殊兮知臭
味之無差池詠風露而未央兮將貽夫予所思

程侍郎遺集卷一

譚瑩玉生覆校

程侍郎遺集初編卷二

歙 程恩澤 春海著

詩

橡繭十詠

并序

黔郡州十三富郡二曰黎平曰遵義黎平以木遵義以繭繭不以桑以橡然非剗於遵義人也乾隆閒守陳君實教之於是食繭利凡數十年春秋繭成歌舞祠陳君如生道光三年冬澤試遵義旋過橡林閒風策策然葉鱗鱗然記所歷郡皆有橡不

以繭今過平越都勻土益沃宜橡因嘆曰處處有
橡處處可繭也富獨遵義平過鎮遠見方伯吳荷
屋先生廉訪宋仁圃先生頒令甲勸民種橡詞懇
懇著街亭時夕陽爛如駐馬讀之過思南還校官
某驛劄出則方伯廉訪督使巡上下游購橡子教
播種期三年成食繭利嗟乎居尊官親民爲謀百
世利思深哉可謂君子儒矣黔土瘠黔民勞勞無
所獲遂積廢不自振曉之曰利在某不信視某地
民遽然顧牆角畦棱有美蔭皆金錢其黠者慮利

與害俱且權之曉之曰有百世利無一日稅也則
又慮購繭器織具紛然貲未入先貲曉之曰如購
種法皆官爲夫民驕子弟也官慈父母也驕乃惰
慈乃周以周起惰惰乃勉皆可學而能也數歲利
必若遵義富甲西南維矣澤職在文字詠歌之可
乎分題十各繫四十言附長篇一則舊冬作也道
光四年秋九月上澣貴州督學使者程恩澤撰
種樹

橡隨在可植三年枝葉蔚可飼蠶飼後休一年

老則充薪炭新肄出仍飼蠶

種樹三年成三年莫嫌遲今日一丸泥它日千絢絲將
絲比薪炭何啻萬倍爲黃金在枝頭巧者能取之

害繭

以綫貫秋繭懸密室溫以火蛾出配乃孕不斷
火子易出

害繭如窖花蛹臥小天裏不知春風來但覺臥欲起雄
雌皆蛾眉生子眇難視一朝能上高萬緒從此始

春放蠶

子旣出承以橡枝葉於筐能自上卽取枝葉縛
之樹

越孃急蠶食意欲親乳哺黔孃忘蠶功一任飽風露得
繭大於甕不顧越孃如回頭笑嬾婦歌舞博紈素

秋放蠶

春繭就暖蛾自出配乃孕以絲兩頭繫兩蛾亘
橡樹間卽育子著枝葉

秋蛾似胡蝶置之高樹巔一繩繫兩雌其情不相連出
殼葉漠漠裊絲頭娟娟當其未成時晝夜防未然

毆蠹

害蠹者鳥也螽也春秋之晝須毆鳥秋夜須毆
螽野蠹先於柘館故古有爲蠹毆雀之官

鳥曰予口甘豈惜人之寒鳥栖_螽又來蠹乎良獨難畏
響毆以析避形毆以竿持謝鳥與螽竝生天地閒

移枝

葉盡蠹未飽剪枝移之它毋_驚蠹

葉葉倣如絡蠹蠹饑不禁剪枝縛它枝移家綠雲深聲
若驟雨來蕭蕭風一林蠹孃未入山常懷已饑心

煮繭

繭成投熱湯入灰汁乃熟乃纒之蛹不能生也或曰蛹混沌無知故昔人無揉蛹法

功成赴湯火幸在混沌時繭剛可使柔絲斷難重治水涑渥以灰古法存於斯齊紈不十年越羅風淒其

上機

絲值蓰繭綢值倍絲功成矣如績學然

直蓰繭值織成金滿屋鐙火連晨星伊軋擾夜讀上
五公姥襦下翦兒女服衣郎郎不著願換來春穀

利無筭

橡可衣可食地寶也

橡粉可療饑橡斗可染皂老枝薪且炭新肄復蠶飽一
物備衣食地乃不愛寶黔富甲天下居者殊艸艸

永不稅

民趨利避害永不稅乃可與圖始

購種與教織瑣瑣皆官貴焉忍復征權如父謀其兒有
衣耀寒暑有金充棟楣土沃民轉勞民勞勞則思

橡繭歌

遵義野蘼成繭曰青桐繭不知於古爲何樹也
癸未仲冬行部過長林閒葉焦繭割矣撥其實
知爲櫟斗櫟斗之子名橡孫炎云櫟似樗按櫟
與樗迥別不得以爾雅之樗繭當之因字曰橡
繭作橡繭歌

冬十一月來播州撲頭黃葉風颼颼是何嘉卉繁且稠
云此可媲桑之柔美蔭捲綠春油油彌山彌澤彌甌窶
不煩山奴玉斧修無事紅女青挂鉤葉以爲箔枝爲幃
結茆承種懸曲樛蠕蠕子子紛相蹂天教寢食得自由

自起白眠登樹頭
暝日出曝雨則僂
蝕厥新甲棄厥盾
神叢打鼓小姑求
宛窳夫人跪樹歐
願生脂鳳無生鳩
爲毆花豹毆栗鷗
竹柝行晝宵乃休
何如彩幡長其旂
娟娟風露春復秋
兩番割繭十倍收
繭熟圓如金彈投
蛾飛大與胡蝶侔
杼聲萬家絲萬抽
蠶孃樂逸機孃愁
蠶功逸
絲功勞流黃縑素充畫樓
可憐龍馬不上鞦韆
秋蠶與馬同
宮蠶盛則少其地乃封千戶
俟我來長林采其劉
知是櫟斗其實
棣斗可染皁實可洩
高士拾之狙公畱
不材之木值十
牛卻顧材木翻包羞
黔中土瘠民臞
昧何不廣植上下

況乃千林散花松側聞西陲雪封山又聞黃河冰塞關
津吏琴瑟幾時歇將軍懸甲猶未還老農旣歡土膏沃
安得新晴遣春晝隆隆鼙鼓中春可憐階前已折紅梅皺
次嚴麗生同年見贈元韻

楚甸風生軫春城斗轉杓青冥來一鶴丹桂舊同僚學
揜紛綸并文包邃雅姚霜天五劍立月嶠九霞燒異夢
通輸廖前身倚太霄長楊空百賦矮屋困三條肯擲封
侯筆翻吹乞食簫干戈淹蜀碧君旅蜀久曾見敎匪之變風雨敝秦
貂易借將軍馬難求博士輶君平甘隱肆高朕許聯鑣

君曾在蜀
中主講
顧我餐岷芋無緣識孟椒占星當有邵焚硯

未逢苗
予使蜀時與君未相遇
倏爾搏沙聚欣然奉檄招鹽車惜

騏驥瓦注辱盧臬玉骨嶙峋蟲仙髯颯爽飄蓋傾無待

熟盞煖即相邀話到夔門峻重懷石棧遙
余入蜀出蜀皆由雲棧未

經三峽故從君問夔門之勝
登堂拜尊宿
時廉訪公就養
驚代讀風謠首遇

揚雲俯情隨伯雪消清奇偏嫵媚高介轉和調游獵談

因管崑崙墮為超承明棄嚴助葉縣得王喬下走儕幽

介中年感舊要卷書頻旅館聽鼓儼僧寮客厭雙弓米

親馨數斗焦黔湘慚刻楮寒暑倦乘躋遂枉珠璣餉如

看虎豹跳氣吞雲澤月聲帶海門潮昔川流人欲覓彈冠友
先尋拔俗標引商難答和珥桂歎微么

訂交詩贈鄧湘皋同年學博

同譜偶然耳對面不相識神交共千里何況几席側早
春造我闥秀眸映火色警詞接輓語握手出胸臆詩名
三十載山海溢殘墨傾倒公諸侯操卷面向北如何賦
窮鳥屢鍛垂天翼古有通榜法原以網奇特使君不奏
牘寸管孰華國誰知高蹈心兼不受吏職苟有田可墾
亦弗苜蓿食我聞師儒官以道以賢得士乃天下本學

用三代式此地里屈宋豈乏走籍湜徒以利祿誘詩禮
亦作賊壇宇倘能闕來者踵相陟我呼我友助俯仰愧
所植我友昌於道其道去華飾詩文道之餘實具龍象
力文得歐蘇正詩欲杜韓逼萬卷紛在眼萬卷付銷蝕
何必擬前古要自道惴惴我意從同同三歎轉默默我
別我友後院鎖不踰闕心知四山外花鳥紅組織我得
我母書慈體康且直幸賴韓康藥共戴陽慶德且念遊
子出家人易惶惑頻款北堂曲告以頤養則傾蓋如白
首此事已堪勒矧更隆我母此意尤悱惻我將盟夫子

海枯石以泐讀君詩若書仰屋三歎息我步嚴子韻投
足畏荆棘君乃步我韻雲棧失其仄豈免過情譽恐是
相親亟會否過嚴子風雨一鐙黑會否話行客行客正
遙憶同心而離居後會宜愛齎愛齎君子交毋使流俗
測

題湘皋哲兄雲渠茂才聽雨山房圖

有季有季阻京雒欲往從之足力弱鐙昏夜闌耿不寐
何當風苦雨又虐一家氤氲尙岑寂旅人傍徨何所託
遙知客去酒尊冷獨立空階數寒柝季抱雄心未甘老

思排青雲奮長鋸公車不錄趙元叔虛想承明備著作
州縣之役徒勞耳不圖人縛適自縛何如歸來翦明燭
臥誦新詩起行藥百年奄忽有時盡畱此白首相盤錯
簪冠櫛具不復御收束黃鍾入趙鐸賤貧尙恃支離篋
富貴先愁紇干雀圖成寄季涕橫下季曰進止仲引卻
引卻季進豈仲願不能肥季使季削誰知季心遠相印
已揣仲志守且恪深憎軾轍隔雲水久慕沮溺耕荒莫
款門忽到天涯季一笑西疇未渝約長牀大被枕資眠
昨夜雨聲殊不惡

張蓉裳學博三分水二分竹一分屋圖

蓉裳名家槩貧無立錫焉得此屋蓋盡其意所

欲也

洞庭之水吞具區瀟湘之竹天下無牽船岸上卽爲屋

安用綠窗朱戶誇妍都我來小舞揚其袂但覺偃抑瓜

牛廬鬻盆作池砌種竹何日一碧雲模餉湖南提學頗署極小頗

思長沙地清絕應有天上員莊居長沙省中竟無佳宅泮宮先生

古林逋宅不枕嶽當襟湖豈知身外無一壺虛想水竹

斜川蘇彈琴攬深醪則愉吟詩肩聳口則呿巖壑不置

謝幼興乃使闢干苜蓿連庭蕪我欲謀之郡大夫爲築

回軒容釣徒資邵之際多林於問有安樂行窩乎

時蓉裳任

新化教諭

小園深裏匝翠明鏡曲照離樓梧詩成琴罷酒

百觚風月與客爭清癯何時眼前突兀見此屋再繪宏

景移家圖否乃往叩浯溪吾寥天一鶴猶可呼

一鶴謂湘皋也

時僕與湘皋有卜居浯溪之想

綠蘿巖

丁亥春日作

玉人曉臨鏡綰作墮馬髻自顧一嫣然光照姊與姊名
流醉敲帽衣角飄風前書味益胸中俯仰皆可憐茲山

勝以態千古向人拜不假草樹色濃秀發天驚回颺叩
其腹其響若鐘鼓其腹疑有月夜夜白如許桃花日暮
天祇愁化流煙安得棹漁舟守山長不眠

桃源詩

避秦入洞壑世世長子孫如何唐畫詩競指仙之人避
秦卽避朱淵明寓言耳如何武陵客日尋簪口水或謂
錯築城投畀鍾者流或謂瞿拾棋曾與仙子遊漁父無
姓氏實以黃道真劉歆非晉人子驥豈前身持以問淵
明不足當一峽高臥北窗下請從羲皇說河湫至奇望

處處神仙家三度過洞戶今年逢桃花桃花爛若錦北風猛如虎一飯不可畱耿耿憶前古

桃源偶作

調朱注黛寫煙鬟濃淚渲成石上斑亦有形同吳寸趾可憐愁煞豆青山

玉源三豔倚丹霞賺得純郎啖落花幸有南軒玉簫在不教陳跡拾胡麻

栗里柴桑豈足耕翻然欲作洞天行偽書不顧淵明唾太守漁郎補姓名

陶公不似謝公顛遮莫來尋洞口煙一掬桃花兩番雨
永初而後太元前

澹巖

左揖元道州右揖柳柳侯茲巖者不得兩先生姓字留
得無草木含泣泉石羞兩先生者不得茲巖遊得無神
物悶情慳其求茇茇二詩老山谷引出千詩鑿山綠我
尋黃九到石屋雙戶呀然差遞而折旋如入暗室薶蒼
煙忽規天光大其圓若啟巨竇側以懸人自竇中窺見
天竇口齒齒藤薛牽亦有鳥道容攀緣竇坐臥人百數

千迤其北西幽且偏其勢總與天光聯磊磊落落方圓
反正凸凹百石友各帶詩痕刻星斗但能飲墨便嫵媚
況乃苔青蘚赤風駁雨蝕朽可憐嘉祐迄今日蕪絕前
賢在深黝或者沒字碑中雜元柳後檢不得遂謂兩先
生文未曾有是時春雲鬱沈沈老龍抱珠潛太陰卻覩
黑暗有若泉迸出深穿蟄雷雷亦爲之暗冷飈襲衣毛
髮直輓土承屨肌肉活當年曾宿避秦客客去乃爲二
隣宅隣亦仙仙不畱蛻吁嗟乎人在壺中若醺雞詩在
石上如鴻泥興來撞石空谷自響答十萬軍聲鳴鼓繁

何人結厂託幽邃道是巖農暄燠盛夏含清淒散仙有
福啖鍾乳旅客亦愛騎青霓昨宵欲來雨未決卻恐馴
狐笑人拙瀟水淡淡橫古愁中有照見元侯柳侯一輪
月

浯溪詩

絕壁照字江清妍影落波底字寫天有臺託之風翩翩
有尊貯酒當客前其壁拒客不可顛卻負曲徑能折旋
不覺攀尊睇沈淵人影字影蒼茫連與臺遙對及臺肩
是曰唐亭秀娟娟萬綠裏之墮江偏迤南招提矗青瑤

有水襟寺橋則穿是曰浯溪聲潺湲色若碧玉刻佩璫
亭寺夾橋高下懸臺北寺南雙壓邊中若堂若廡若船
率聚怪石相牽纏人在畫屏據几筵石無定相隨其緣
左才半之右復全玲瓏瘦皺殊可憐樹爲石偃樹以攀
虎豹挐攫蛟龍蜷就中壽樟不計年放雲收雲司其權
雲染樹綠飛溼棉石亦透骨莓苔湔古路可踏溪可沿
繚繞往復心纏綿有盡藏如無盡焉乃知林壑規以圓
面面不同如面然忘其跬步越陌阡若鳥在林魚在川
掩映別有亭三椽尋其故基仍古先壁字最著中興鐫

臺亭溪以玉筍聯友讓得宅畱紅箋持正論文出真詮
此外黃米俱騰騫此外柳記殊怪祇此外碎金兼斷璇
上極絕頂下江壖一舉手皆可蠟璽石無完膚石不愆
石言若曰何茈茈卻剔蓬蘽搜螭涎大有逸字薶蒼煙
炯如三五離次躔如蛇螭斷謝蜿蜒文人好名思久傳
不計陵谷恆倒顛百千萬年年以還賸有幾字畱其堅
人跡不到疑鬼僊豈知一一皆前賢客告余曰盍舍旃
請就茆厂烹清泉共話漫郎心志專羣書當戶石鏡便
害馬已去世事捐蕭然雲月同醉眠況乃道州馨粥餽

父母何在在我廬其風如薰道如弦故宜俎豆常吉蠲
百世相感我停鞭華星一珠吟一篇酌酒祝公公叩舷
何必故山方買田但恐巢許囊無錢

春寒

電光灼冰冰欲熱疾雷驅下五更雪奇寒中膚布衾鐵
馬毛蝟縮馬蹄折石魚山頭曉風起漣水波紋蹙成綺
只道冷雲無好春誰知開落半山李行人猶披青鼠裘
居人擁壚酒新篘可憐十日不見日白晝然鐙坐漆室
洗筆池懷褚中令

宸妃欲閉回心院
英國空謀陛下家
若聽知幾強諫
獠何須議
草上官麻龍
滌豔后貪天
醉鵬臆孤臣
感日斜
雙管東風萬行淚
灑來都作墨池花

鳥語

短竹卑叢錯雜鳴
曉窗不顧睡人驚
但能悅耳斯爲快
豈料呼春別有情
繡闥渠儂兒女語
畫船風日管絃聲
若教邂逅陀龍聽
石闕深銜過一生

望壺頭山有懷伏波將軍

下澤車款段馬春紅
初齊綠初亞
征人臨鏡照水田中

有壺頭山影圓壺頭去天才一握聞道靈蛇大如屋三
千年來素帕首想見蒼黎當日哭秀眉將軍真神人牀
下不荅梁伯孫名言誠子反賈禍苴薏滿載徒埋冤將
軍徑充嫌運遠翻以賈胡遭詬譴將軍主戰不主綏欲
洗劉武威喪師當時二耿亦相厄以後叔庠偏畫奇吁
嗟乎臨軒已覺將軍老何況讒言塞直道英雄莫叩囊
底智百戰終當付秋草將軍稔謀豈不知羞逐少游游
閒兒生不願雲臺畫功狗死不願淳酒婦人手病倒疆
場裏馬革一笑臣心挂南斗君不見溪州銅柱森我我

異代銘勛宗伏波梁松柰我昭靈何

嘲北風

澧州道中作

西北峒雲頑且頽怒風驅之黑縱橫包裹億萬石花雪
欲填洞庭使之平老龍羣飛抗而爭半空使風如使兵
崖瓦亂掀如紙輕屑屑珠玉灑灑墜窗破帷裂連五更
曉來一白山崢嶸餘怒在樹猶長鳴倘一夜力埋谷坑
得不馬仆行人驚呼童埽砌僅寸許不滿力士三茶鐺
乃知蜚廉妄庸耳虛作倒海傾山聲嗚呼虛作倒海傾
山聲孰雄孰雌徒其名

澧州

北枕涔與澹南帶澧若道

澧涔澹道四經流名

維西亂源匯直絡

復橫繞東則江沱注三派曲相抱孤城面面水浮動兀

一島當其夏秋漲東下海灝滌洞庭九州大徧吸亦難

飽四水得所向若子趨厥媪豈料江沱至神力龍天矯

四水能弗鬪遇之竟弱小況值圩堰阻青青馥其稻築

捍各競峻屹屹對厥堡水怒不可洩水徑益以宵一怒

復再怒森然出鱗爪齧隄更齧郭其勢便欲沼莫恃文

良制

文良制石爲之以分澧漲

及我西東棗

西東護城隄棗隄皆防四水潰者

不與

水爭地何患馮蠡鰲苟與水爭地盪決等振槁城垣儼
不守田禾亦奚保且聞上游塞沙礫挾木草深渠化淺
覓春泥壅秋潦若使下游暢一白湖天曉今夏四水溢
奔赴疾如鳥飄風帥猛雨夜半助其狡隄泐頽然缺城
危竅欲倒老少相踐踏壯者據木杪倚堞手可盥俯堞
膽先掉咫尺卽溟渤千里一浩渺雷砰大塊碎鯨呿萬
夫撓幸賴使君力不棄一瓠實止其溺人笑授以黃襪
襪稍稍就安戢一一出流殍萬手指圩堰恨不仆其表
人指天亦怒頃刻大波掃

官私園齊開
水乃得洩

六晝夜水退相

與卜平燥當夫昏墊際悔不疏瀹早及夫灑澹後晏坐
食新麩所望賢通侯高踞雙目瞭此利彼必害灼見析
豪秒俾城作鐵室治水去毀擣圩堰可決決黎赤仍不
擾陂有兩黃鵠野富六稊導卽看雪霞集林邑便已浩
下走樂無事濡筆紀豐兆詩成九澧側凍日紅杲杲

大風渡澧水滿天雪意

郭外朔風殊跋扈田閒輟水亦春撞寒煙一雨便沈屋
落葉萬鴉同渡江倦骨入冬翻覺健雄心當酒未全降
馬頭莫惜征衫溼看取年豐雪打窗

贈王大令香杜兼呈鄧湘皋學博

銜卹未得歸墨經行且朽色養未能遂盼斷倚閭母勁
風從西至人獸盡東首悞抑孝子心孤館一鐙久孝子
固良吏慎受慎所授不揣汚螻意乃致讒謗口今豈必
直道弗媚眾卽詬況復工爲文世道例獲咎

文章至今日積弱不可強稟賦益以薄風骨何其尪必
有扛鼎力美醜斯可商不乃吹死灰折筭驅跛牂君筆
鐵鹿盧八角森鋒鏖能續人怒嬉與龍拏鳥鵲先秦兩
漢閒其氣宏且剛上取縱得中不失韓柳行誰謂宛轉

絲能敵百鍊鋼

直竹中箭筈羽鏃益厥殺健筆入無閒萬卷成厥大才
識生於學學生於不懈文始須放縱繼乃戒捷快渾渾
其源來江海一蒂芥上明周孔道下與出處對固恥傍
門戶亦必紬佻怪此事出天性悠悠古今會與子行將
別請俟異日話

東海何洋洋子懷鼉賈才安可便廢置尙有黃金臺名
山多餒魂焚溺蝨魚灰窮達戀薄祿萬一親顏開得志
行吾學百折不可回石上萬言書長嘯歸去來

斯文吾道閒清切惟畏友與若已者處壁鏡寫我醜
拜先生筆欲作每箱口吾拜鄧子詩握管輒棘手前有
大敵在角逐慎其衄脂澤哀駘姿冀有孟姬首子今去
長沙誰濯我背垢急歸招鄧子促席連卯酉各有名譽
心偃仰看南斗

題孝女張淑先籲天煮藥圖

讀破岐黃書不如揣病情父寒父熱女則明投熱毋投
寒女一議出父乃生代死古所難天公愜其旨血疏上
奏女竟死篋有焚餘草草未出時父病已嗚呼使曹娥

聞之得不先迓婆娑神緹縈贖父書僅以春藁聞嗚呼
淑先女叔先雄豈前身

賀湘皋移居

欲將安樂行窩築其柰茆龍葺不新

湘皋寓敝齋屋宇甚陋

造膝

喜當交讓樹窺垣時見一方人

君下榻敝齋相得甚歡又精醫術時與老親診

視

炎歊卻掃同局戶風雪移居又買鄰遮莫張羅官署

冷尙嫌熏灼庾公塵

不由旬地接書堂家貨遷來有底忙祇許琴尊環白醉

漫勞車馬識青楊寄貲已自煩裴冕

謂康大中丞假以僦屋貲賃廡

終須對孟光明春卷料得玉潭新講舍早梅無限待詩香

歲暮雜感次前韻簡湘皋

眼底茫茫風雨集天涯草草歲華新居州未必工齊語
莊舄徒勞感越人肯爲分金儕北郭屢因撲棗戒東鄰
年來飲徧沅湘水依舊萊蕪甌滿塵

豈有天花落講堂談經習業爲誰忙曾披椒櫞求芳草
要屏箚畫聽折楊殘客儀形忘謝謔故人風味類思光

謂湘青熒鐙火宜相對領略齋廚晝粥香

湘皋以歲暮書感詩見示獎詡過情因疊前韻答之

齋居見說清於水風雪初闌物候新卅載無羶堪坐客
連宵聽雨定懷人謂湘皋之兄雲渠君如蔣詡開荒徑我爲東
坡署德鄰坡公有德有鄰堂試杜席門欹瓦枕喧喧多少馬蹄
塵

問奇載酒叩書堂信有磨人子墨忙盡道有才過屈宋
劇憐競爽得王楊謂礪東萬金良藥蘇沈猶一割鉛刀愧
步光我自蕭齋拜詩佛夜寒親試玉麝香

詠史仍疊前韻

粟轉梯山連歲腐蝨生甲冑幾回新定知領領稱飛將
不是恂恂一鄙人爰劒竄身翻蔽燄添鞬突網轉驕鄰
若教狐兔輕鷹犬誰掃輪臺徼外塵

出奇休恃陣堂堂銀鵲虛奔底事忙未見兩髀皆脫肉
卻疑左肘屢生楊老謀已竭哥舒翰將種新除斛律光
料得祁連無雪阻西風萬里戰袍香

湘皋見示移居後連日大雪之作卽次其韻

風屑稽灰勢未殫臥聞冰箸墮珊珊舉盃欲共天酣醉

命駕先愁海浩漫人迂王恭初著筆詩踰東野不言寒

誰知妥靈蘇蘭役別有青腰玉女官

謂新納
姬人也

醉司命日作復用前韻

筒裏錢刀日益殫尙思朋酒恣盤珊黃羊亦是尋常饌
郭禪原非耳目官信有日明何可煬不因人熱乃能寒
糟糲抹後朝真去祇恐風多雪復漫

雪後嫩晴倒壘前韻

銀蚪掉尾避蒼官尙作春來數日寒此土已戕旁不肖

岳州今歲多蝗此番
雪後當無遺種矣

我師猶戍折羅漫老梅姪姹欹香

玉小竹鬚髻綴女珊欲趁新晴挈游榼卻愁泥滑馬蘭殫

追題黃丈東井五老圖應其嗣君支山屬

二老踞亭倚檻話二老藉苕書作界坐石一老風骨最是漢循吏次公輩朗徹其裏碩厥外讀書成誦瀉水快爲政禽賊不用械不撫所仕塞其兌歸來息園解冠佩遂與四皓成古會花竹瀟灑地幽隘往往談讌出光怪二江夏黃侍而介一進酒一杖而艾

支山侍旁持杖杖頭挂艾

四賓

色怡一主對各有真意各天籟紛紛偃僂戀冠蓋鐘鳴

牙仁長集卷二
漏盡不知退聞先生風得無悔先生父行我所戴杖而
艾者我所拜老成典型吁可喟試看流星入昴內

題闕畫師嵐觀潮圖

字雲山

兩龍伯操繫海練勢自東走飛入西萬雷裂雲萬牛吼
聲自地腹穿天臍況當月皎冬霽霏浪花白壓銀河低
喝月月倒行吞月月無影素車白馬欲到未到際但覺
橫空一鏡當頭冷清輝直射雪山透怒流曲卷圓珠駢
其下島岸秋毫見其上星斗動搖頃我曾邂逅錢唐潮
聞道海昌尤怒驕

君在海昌觀潮因作是圖

歸來仰屋畫不得谷分

厓畛徒喧囂畫水有聲况畫潮天意特遣張僧繇先生
笈裏有龕赭八月枚乘拜其下

闕畫師嵐我與我周旋行樂圖

我未晤雲山不知其人視其友

圖中盡乾嘉間名流所作

我已讀其

畫卽今誰是宋元手我識雲山壯時面火色高頤目如
電才名卅載食無肉聞道龍鍾鬢垂練自照已非當日
顏彩筆尙轟金琅玕卽今誰是宋元手我與我外殊無
偶

乘迅流賀逆風

乘流快意下風又助其駛曾否窺落際無亦觸坎止風
水力一悟雙櫓戛不已三老詛風伯不計上瀨彼上瀨
爭尺寸帆纜互相倚依然背篙叫手繭足交舐風性至
無定旦暮不可恃水萬折必東吾亦欲東耳好山常俯
仰倦鳥同臥起况聞報郵籤日已行百里

沈栗仲同年宰酈縣以弦歌化之邑能鼓雅琴者
四十餘戶其治可想以詩贈之

一夫弦歌千室鳴古有單父東武城三代以還無此聲
此聲能使王侯貴閒暇無事修太平化我鳴臬哺所生

雲秋之水北入沚上有神父秉周禮攬深醪愉萬事理
偶欲登高臨淶水諸生十百希厥旨路人咸詫問所以
指絲桐曰命之矣茆厂夜月彈流泉杼聲書聲相糾纏
稍涉北鄙便自愧何況洙泗斷斷焉邦君憑軒廢古篇
邦人和之如衆僊趣拜炎陵求練弦翦其青牛剉雙角
夔襄薦技班倕鑄君曾取炎陵梓作琴神農大笑投赭鞭此調不
傳數千年恨君不識袁孝尼恨我不識元魯山于焉于
曲已徧誦廣陵妙散胡可慳不成章我亦不作但欲博
我高堂歡時欲就君學琴進觀君藝何徧爛能詩畫書奕劒丸

所可測者器數閒不可測者海波瀾廿年同舉今甫面
冰雪同清鐵同鍊愔愔琴德美可眷君山豈受宣平薦
五枝都窮臥花縣何當密友羅曲宴三疊胎仙舞深院
座中那有鍾子期祇恐鼯鼯側冠弁

郴州五蓋山至峻屹其巔有峯益高戴龍湫湫下
坎產石若端溪郴人取而礪不知硯材也刺史
曾君鉦識而寶之以爲勝端溪下巖丁亥秋余
在長沙忽一夕夢造刺史室室盡硯邀賞之遂
懷一去覺而寓書於刺史以爲笑時絕不似有

得硯事也刺史蒼書述果得硯故且詫我夢我
亦自詫其臘小除刺史餉硯二啟視之皆夢中
所見也刺史有詩作此奉酬

五蓋齒齒齧霄漢上猶有峯安可窮其峯碑兀戴神漢
云是雷電龍所宮潛源一綫穴南澥靈液饋醴蒸雲紅
雲乾液枯漸可割化作百萬圭璋琮何人欲斲不敢斲
斧鑿落處飛晴虹尺寸偶挂使君眼云此實與端溪同
試琢平坦著子墨其色黝黝花叢叢能飲陳思八斗血
能了潘谷三年春左右驚瞻詫環瑋使君荷雨親相從

使君能文善隸古以石爲友書爲農故因華妙聞帝所
冊以卽墨諸侯封况復俎豆韓張李得不誠感昌黎公
時正濬北湖建韓文公祠報以文玩助文藻濡染柳筆
而以張員外李使君配食傾湘東卻怪遲錦與江管無乃夢幻空其空而我以夢
詣君所自堂徂室窺簾櫳畫屏斐几發竒怪是何物者
光熊熊如肌肉活怯指按如煙霧凝愁風攻紫者膩墨
比刮竹青者摧墨儕撥麴一廬之內臥礫河有似馬磨
環其躬我懷其一拜君去仿佛度嶽聞清鐘覺來挑鐙
索席扃依舊敗瓦歆詩筒乃修魚素博君晒君荅不鹿

藏隍中我欲順途詠其事君乃錦帕雙其蒙繩罔匪啟
爛然出與夢所見無殊蹤急溯并華過一斗不暇作字
專磨確麝香漚鬱衫袖黦一笑殘歲昨嶮終轉憐硬不
入君鑒女以搗練男銛鋒有若偉士遁荒隘頭白志拙
無遭逢卽今走馬望五蓋欲詣君室偏匆匆何妨昔昔
夢爲僕手把椎斫披蒙茸并儼撰銘五千首一一劖徧
仙芙蓉大呼石超爾何在曷亦拜倒曾南豐

其顛峯有石超道人

題千雷萬
電等語

忠孝女沈將軍歌

獻賊殺人若薙草長沙以南無完堡避賊鋒者走且僵

諸統制師皆女郎守備獨以孤軍當

孝女父沈至緒

殄賊過半

身乃戕身戕其骨爲賊得孝女哭父淚盡血刀如青霜

馬如雪白甲白旗白袴褶一隊銀龍翻虎穴賊見孝女

疑飛神弓不暇彎矛不謹但覺仆如木偶人多羅棉手

劍鋒利左鋌右鋌恣我意帳中萬賊俱伏地忠臣骨在

孝女肩歸來一慟雲黯天環陴士卒誓死守忠臣屍與

州城全獻賊不敢窺其藩孝女志與州城堅詔褒嬋媛

晉遊府十六芳齡帥貔虎五嶺以外聞其鼓鼓聲忽死

麾不揚天涯熱血埋干將夫亦戰死爲國殤

孝女夫
賈萬策

夫

逐父去魂洋洋妾感身世何蒼涼脫我綠沈之甲還君
王雞斯徒跣奔故鄉青鐙萬卷聲琅琅殺賊手說經口
宣文女徒環座右花時不作兒女夢夢見彎弧射天狗
滄桑一變無何有只此能忠能孝能節奇女子女雲臺
上三不朽况復文能傳經武戡亂俯盡天下雄才首君
不見明珠繡帔麻灘祠異代猶作勤王思嗚呼孝女何
其奇

書劉母田太宜人事應觀亭司馬之請

太宜人姓田氏雄縣巨族女公子父宦伊涼侍杖履芳
年玉映蘭閨裏孝經內則常在手更尋列女到彤史喜
觀相人書喜覽聿斯經喜繙靈蘭祕典冊喜講司空城
旦刑學成一笑凌青雲百家古有義成君斯時劉大令
正宰古浪縣宓子琴絲忽中斷誰歟來續鴛鴦綫太宜
人歸甫卻扇卽能撫前夫人子如已兒憐其羸弱不可
支趣爲納婦似續斯兒薄祿相孫含飴大令政成殞厥
命官衙鴉散雪霜迸嗟哉太宜人血涕掩鸞鏡以一手
持大廈傾以一手扶旅櫬行提孤挈嬰愁避兵突風吹

到刀槊聲萬賊據險不可爭急卷雪衣投柳營兒羸兒
弱竟以哀毀死可憐兩樁父若子卻顧非柯尚千里有
姪廷模遭諸途涕交頤下紅模餽姪已遴選不入都願
送阿姆還鄉閭便卜窀穸藏王鳧興吾宗者廷模乎奈
何欲以閒冗出乃搜賄布括珠瑟遂以貲領大尹秩廷
模迎養楚水濱太宜人笑花縣春太宜人歎廷模詢其
諸官事失厥倫太宜人曰爾治爾邑無冤民我歎我親
未邱首我生未履易之阜此生得周易水石到時族黨
知何有阿誰能似聊曼母廷模一朝報最北人京板輿

遂過雄之城太君不識東平瑩忽遇田父僂而耕問之
指點說宰樹再拜祠下感霜露父老太息子弟驚乃屬
子弟往迎雙玉棺由都下以窆易于嗚呼田氏有孝女
劉氏有賢母相夫治劇久訓姪治譜守使夫有孫繼厥
後使姪佩印大如斗使親得瘞故山左今紛紛拜太宜
人者皆廷模之友乃問吉嘉問凶醜云能貫穿李常容
包括鳴雌負我正告諸君曰問太宜人當以大節先求
之古豪賢恐無多讓焉

道光辛巳夏秋予兩過東泐高帶堂前輩適守鳳

翔爲東道主丙戌戊子之夏予兩試衡州蒞堂
觀察是邦兩招飲於湘蒸之僻撫今追昔匆匆
八年矣賦此志感

東湖之水碧且黝君投其盃石螭吼蒸湘之水弟若兄
君挂其笏紅亭明坡翁一別韓子迂可惜熊魚不雙炙
爾來王佐頌邦君已見文章開講舍不疑自守慈母訓
興祖一任妻孥訝

觀察署中
無眷屬

然夏非夏秋非秋屢以雀

躍從君遊憶昔醉我岐下月鳳凰耳畔鳴啾啾君歸我
臥兩寂寞明日蹀躞周原頭豈料共飲蒸湘流手拂石

鼓維扁舟十日閑置作新婦一朝泮散如風鷗驂驪八
載幾彈指我顰其面君髯矣各有高堂皆髮白苦無二
頃供甘旨公侯衮衮君其徒曾讀城旦司空書我似鴟
夸託屬車未免瓠落慙江湖前年酌我紅亭側竹樹圍
團裏筵碧今復期我衡之屏想見九疊環亭青有岳屏
小飲之
招尙未
赴也何時再訪璜溪釣只合出門西向笑璜溪屬
鳳翔

贈譚鐵蕭太守

光祐

譚侯貴公子慷慨多大節朱門少年日開口怨離別袖
中五色管盛夏集冰雪翩翩困科第前輩盡傾折投筆

未四十才名動

宮闕家門骨肉苦朋友遇合缺舟車竄風雨肝膽變胡
越仰天吐偉句真氣偃溟渤其來無首尾其去彌邊瀾
其勁若引滿其曲若蟠屈只留青蒼色不受脂粉抹藏
園避其鋒子山拜其律謂吳蘭雪舍人獨於西江社施以杜韓
幟看花席尊酒射虎挾箭箬一篇偶飛出傳誦已嘖嘖
或招金閨彥或入玉人瑟與滿侯不怡危坐求古昔公
卿塞閭巷無路取簪黻竟騎將軍馬殺賊草羽檄功成
薄受賞踏遍蜀山兀眾水在指掌環混不能溢可書便

可繪談笑江漢決

侯著有四川水道源流簡明說

爾來向南楚美政不

勝說封侯已遲暮况乃未騰達前席求異才賢喆爭擢

拔得權功乃大詎豔乘麾鉞我昔使益部晤侯摩訶側

忽忽六閱載聞聲每傾結行部見資邵兩江會而激辛巳

秋遇侯於四川試院頃按

試寶慶府屈侯爲提調衙官到屈宋流汗愧且脈旁

午必劇談露曉與鐙夕侯氣清而夸侯論雅以質渾忘

古劒銳但覺大圭潔英雄固名士兒女亦仙佛

侯有英雄兒女

圖

我懷湖海志共此一腔熱喜聞忠孝語力埽迂懦轍

讀侯卷未盡起舞更叫絕想當歌哭際吹裂六州鐵侯又

有吹簫
乞食圖

作者不經意聞者輒嗚咽卽今好風日花發水
清澈春風貫簫孔山勢屹詩骨茅亭踐蘭約洗耳聽奇
突金石畱逸響蛟龍起深窟蒼茫千萬感爛漫二三月

題李海駒太守海上釣鰲圖

丁亥

朔風初繫歸客槎占有大星來軫車乍覲面乃等疇昔
使喚滄洲老龍伯肌髮光細僊之人飲我白湯如飲醇
卅年循政浹淞水能化巨盜作順子何況鄭兒開門孤
所到盡以家公呼情慙德滿意款款溢爲文儒白玉管
吐辭淵雅天所授東郭順子人意消曾從絕險造平澹

山嶽壁壘不可撼釣竿撐突天地臍淞東以至蒼梧西
君自浙來永州與任公子淞水以東蒼梧以西之說相應五千之牯一鉤月鼃上不
上山硨磲誰知六六齊點頭蓄以盃水以芥舟才雄志
大類若此眼中詎有任公子

前席晝夜求軼才使君握電驅風雷一日九遷無喜色
一息六月豈太息况復水清山古幽友猗玕子友柳侯
虎符龍節果來逼袖中放出奠柱力何時海上三神山
十丈珊瑚紅一竿希有鳥拂大鵬翮笑倒君家釣鼃客
太白有大鵬遇希有鳥賦

題陳西侯問津圖三首

問渡從來不繫船
誰教越客此停鞭
江潭柳色春如許
振觸名場二十年

賦罷姬隅漫自猜
驩駟道路劃然開
劇憐驚座通侯氣

元是微雲女壻才

西侯爲吳山尊先生壻

錦作蓬萊玉作京
蟠仙指處最分明
定知馬穩春山闊
不向青苔仄徑行

山行看花三首

桃花冷雨春濛濛
和以溼雲從以風
馬蹄汨汨踏泉脈

山翁掩戶笑行客一叢穠李出竹枝玉顏翠袖天人姿
綠章今日達帝所孟婆前日已含怒

山花開落風雨司瓶花開落自主持瓶花無根不可活
山花落盡行復發有開無落花之心不風不雨花不禁
但名爲花總須落請看長松臥深壑

殢巖絕巘花因依斷橋僻徑糝素緋不受豪家畫檻貯
不上玉人雙鬢去如雲如海搖東風日暮可憐誰與同
鶯穿蝶抱皆知已況是攜尊賞落蕊

辰龍關

我曾徧踏黔蜀山辰龍卑卑不足數祇緣峽立四壁鐵
天割一綫不可補萬里風來洒客面帶滇之雲黔之雨
沅南羣峯盡綰轂有望亂源繞門戶卽看鐵星陷石臼
嗟哉逆藩此最怒頻年自恃雄關閉豈料閒道通貔虎
高崖細溪左右出更抄清捷背張弩賊進喪膽退失據
黔滇自此摧螳斧名山自昔多窟穴如蜂窠簇如齒齠
淮陰曾拔井陘幟武惠亦避劍門阻傳云在德不在險
天竈凶門誰敢侮何況辰龍瑣瑣耳以逆犯順盜憎主
春山卉木紅連屋晴日鷓鴣啼到午馬蹄人影自來去

前村正打催花鼓

仙人房仙人劍詩

斧斲壁立窺江傾上戴棟柱樓梧撐仙不世居此閒營
白人視之笇簞盛仙或視之華屋盈了無風雨飄搖驚
兩崖對拆數櫺橫眠一長劍丹青明後其臘鋒前其莖
莖首有眊銳而輕大匱蠹蠹舟庚庚既置家貨復貯兵
仙人無乃恆人情當年有路通客行或石未泐壁則平
或水勢高凌崢嶸偶簇朽木得氣精人則爲之似天成
向後路斷不可耕空際遂裏煙雲生衡風琅琅木葉鳴

猿猱仰羨鳥若駐今宵天開月則清其諸仿佛來鶴笙
我欲一假干將擎卻恐吹鼻啞無聲

題鄧子與詩卷應湘皋屬

字逸詩清人磊落蒼茫一幀至今留能吟誰識連文鳳

感舊偏悲釋貫休

子與明遺逸其詩
弔詩僧某亦遺老

事去劫灰餘冷淚

時來寶月入冥搜先生有志肩文獻無限沈珠待網求

泌溪垂釣圖爲歐陽同年題

名佶

佶之父竹庵先生孝養其母母嗜魚因釣以供

饌母歿後惟祭一釣也其詰嗣佶出此圖索詩

五侯之鯖五鼎養不若負米急朝餉魚監之魚取諸官
不若隱君青竹竿素髻旣割薑桂馥老親一笑捫其腹
溪水迴曲溪風妍又送唼聲來耳邊岸巾以晴笠以雨
過者疑巖復疑呂枯魚銜索一朝殂胥跡漸掃落痕蕪
偶因薦新理芳粒旁有李蘭助其泣謂公配何孺人至今溪流
玉潺潺想見道貍清而閒冰下老魚慎勿觸曾飽當日
仁人粟

詠史

劉尚師全覆陳湯老據鞍有書招贊普無劍斬樓蘭輓

粟談何易懸軍古所難微聞漢恩厚將相已彈冠

大龍驛雙桂軒

我今五渡漸江水愛此雙桂幽且妍

漸水在三十鋪

好花一度

未曾見明月三十七回圓山僧行腳過萬里館人白頭已廿年往來數數殊自愧忠言奇謀奚在焉

再題龍陽驛館

寒日未曛曉亭光已向東煙馳大地白霜濛半天紅帆布支提杪人家菜把中欲招圖畫手破曉坐微風

橋曲四五折花增千百羣使君能頌橘過客正書裙

董大

令阿郎在
園讀書

緣厚園逾古茶香鳥共聞登高知政理耕織

日紛紛

呂麗堂太守射虎圖

戊子

民奔呼山有虎朝暮食三人一媼一齠一婦女民奔呼
太守呻虎胡爲哉噉我赤子如噉豚糾我眾礪我矢虎
來虎來爾必死虎不負隅乃走壙得無政感神所相虎
就誅亟訴無狀白羽洞背直達吭虎魂零星虎膽喪殺
虎如鼠歸來歌太守之勇于廣何恤其彼鬻帛其寧太
守之仁與均敵斯時穰稔黃雲平腰鎌夜穫無恐驚害

除民樂設社酒招邀健兒飲一斗

小谷黃丈善繪事言湘山之綠勝江南因賦此

柔風東來小波舞夕陽睡起湘之潯但覺蕉梧繞窗戶
不道羣山碧如許近山茸茸如裹煙遠山楚楚混遠天
小橋叢薄幽折入奇石老樹周遭圓誰歟畫此山嬋娟
癡黃大呼山來前廿年夢裏盡蒼翠要與造物爭天然
六朝雲氣滿行篋片片墮入西巖楫憑將十斛好螺黛
染取百幅羅裙褶春歸嫩晴殊可人米家几研若爲新
祝君畫取詩中意消得柳侯一綠字

題黃小谷畫

楚楚丹黃壓樹鮮
疏疏籬落帶花妍
緯蕭亦有江干屋
吹破西風已十年

杏花旆旆柳柔柔
屋角春禽促駕牛
縱不有秋聊自樂
絕勝辛苦覓封侯

蒲圻道中

鐵纜雙磨巨艦排
馬蹄浩浩走風雷
蒲山勢到沙羨俯
修水源從下雋來
萬頃稻肥秋雨缺
三更雞睡大星催
蒼茫憶古空搔首
不見東吳右部才

灞湖

距漢口鎮十餘里有湖焉滙灞水及江支流阻
塞孔道約四十里許春夏閒非舟不能渡秋盡
冬來則成坦途矣

排空萬櫂舞漣漪無限斑駁脫玉羈人道秋田恃甘井
天教夏潦作湯池商量更鑿梁山灤反覆誰歌鴻郢陂
時有廢湖
爲田之說卻愛遠村開夕照柳行如屋竹如籬

有感

濃朱厚黛損天真况復蹢躅强效顰但倚市門都辦此

何須絕世浣紗人

連宵珠彩貫晴秋月
在東南第一樓
喫詬離朱皆不得
卻教象罔漫相求

黃陂道中

南司州地才經過平楚
蒼然四望陰金氣
西來風跋扈
旱雲東積火燔燁
忍看龜兆千尋坼
不乞龍鬚一滴深
我亦鋤犁能把耨
苦無千頃換黃金

武勝關

音慕直轅天下險
今驅羸馬踏雲來
了無磴道千盤峻

但覺回飈萬壑哀淮漢背流敗亂冰中黃自古鬥雄才
果然談笑能擒賊合向牛醫耐一栢黃叔度擒司馬龍
故事見天祿閣外

西平道中

刺促成何事差池不可齊功名上蔡犬歲月汝南雞種
憐秋鬢紛紛憫夏畦誰歟佩霜劍淬礪向棠谿

臨潁道中

日暮途歧已自憐何堪猛雨助憂煎潦翻一馬行將斃
風殺雙鐙不可然羹飯無緣瓢欲棄我稠何處楊空懸

楊朱失路渾如此忍誦駢夫四牡篇

潁川書感

漢潁川郡今許州也

潁川黃與太邱陳怪底精靈感召神庭廡時時下鸞鳳
盃盤草草聚星辰豈無北舍來鴻雀亦有東行說異人
畢竟傳疑卽傳信薰然明德藹如春

曉熱

山形入莽蒼秋旭向昏黃露稻通宵重風荷隔塢香心
疲成漫嬾語癖漸疏狂試問勞勞者曾思枕簟涼

過新鄭喜晤家益堂大令

德增

相逢韋杜鶯花曲爛漫同傾瓊盃入座樂緣車武起
叩門聲識孟公來青山歷歷游如昨宦海茫茫首重回
今日驅車尋桔枳

鄭南門也

人傳君是惠人才

由豫入燕日日看太行

自渡金河北連山盡太行鬱雲朝磳磳團月夜蒼涼形
勢幽并豫波濤沁衛漳西虹飲東海千數里而強

邯鄲懷古

茗花顏色夢中栽錦瑟銀箏絕可哀豈有壽陵能學步
斷無斯養解憐才溫明尙記蕭王殿歌舞難尋主父臺

祇有宮池舊眉影夜深還化月鉤來

索炬歎

一月不雨稻不粒東疇西疇屏水急官符夜下鳩丁男
明日行旆昇貴官鞭之不起訴非嬾心逐桔槔輪裏轉
歸來一飯未安處忽聞伍伯詆且怒踏破柴門索蕉炬

程侍郎遺集卷二

譚瑩玉生覆校